



Број/ Број : 03/4

Сарајево/ Сарајево: 15. 3. 2012.

IZVJEŠTAJ

sa VI. konferencije parlamentarnih komisija za evropske integracije država obuhvaćenih procesom stabilizacije i pridruživanja Jugoistočne Evrope, održane 8.3.2012., u Tirani

Šesta konferencija parlamentarnih komisija za evropske integracije država obuhvaćenih procesom stabilizacije i pridruživanja Jugoistočne Evrope (COSAP) održana je, 8. 3. 2012., u Tirani.

U delegaciji Parlamentarne skupštine BiH bili su: Halid Genjac, predsjedavajući Zajedničke komisije za evropske integracije PSBiH, Borjana Krišto, zamjenica predsjedavajućeg Zajedničke komisije, i Staša Košarac, član Komisije. Konferenciji je prisustvovala i Vlatka Dangubić, sekretar Zajedničke komisije.

Šesta konferencija COSAP-a organizirana je na poziv predsjednika Komisije za evropske integracije albanskog parlamenta Ditmira Bushatija. Sastanku, zbog obaveza vezanih za ratifikaciju Pristupnog sporazuma Hrvatske i EU, nije prisustvovala delegacija Odbora za evropske integracije Hrvatskog sabora. Na Konferenciji su učestvovali i gosti iz Velike narodne skupštine Republike Turske, predstavnici Regionalnog vijeća za saradnju (RCC) i Regionalnog sekretarijata za parlamentarnu saradnju u jugoistočnoj Evropi (RSPC SEE), kao i predstavnici Evropske unije u Albaniji, Organizacije za evropsku sigurnost i saradnju (OSCE) i Fondacije 'Fridrich Ebert'.

Teme razgovora ove konferencije bile su:

1. Uloga i odgovornosti komisija za evropske poslove u trenutnoj fazi procesa integriranja u EU;
2. Trenutni izazovi Sporazuma o stabilizaciji i pridruživanju/ proces pregovaranja s EU i obaveze koje slijede za komisije za evropske integracije;
3. Debata o budućim izazovima i metodama rada COSAP-a.

Konferenciju je otvorila Jozefina Topalli, predsjednica albanskog parlamenta. Nakon obraćanja gđe Topalli, pozdravne govore održali su: Ettore Sequi, šef Delegacije EU u Albaniji, Ditmir Bushati, predsjedavajući Komisije za evropske integracije Parlamenta Albanije, Michael Weichert, šef Fondacije 'Friedrich Ebert' u Tirani, i Jelica Minić, zamjenica generalnog sekretara Vijeća za regionalnu saradnju (RCC). Svi govornici pozdravili su napredak zemalja u regiji i čestitali na uspjehu, prije svega Hrvatskoj koja je potpisala Pristupni sporazum s EU i koja će, 1.7.2013., postati punopravna članica EU, te Srbiji i Crnoj Gori na dobivanju statusa kandidata. Istakli su značaj regionalne saradnje komisija za evropske integracije parlamenata, razmjene iskustava i preuzimanja pozitivne prakse od parlamenata koji su uspješno okončali proces integracije.

Uvodničar za prvu tačku dnevnog reda – „Uloga i odgovornosti komisija za evropske poslove u trenutnoj fazi procesa integriranja u EU“ bili su Laslo Varga, predsjedavajući Odbora za evropske integracije Narodne skupštine Republike Srbije, i prof. dr. Mehmet Tekelioglu, predsjedavajući Komisije za EU Velike narodne skupštine Republike Turske. Sve delegacije imale su petominutno izlaganje o općem angažmanu parlamenta i posebnoj ulozi komisija za evropske poslove u procesu pregovaranja s EU, statusu i odgovornosti komisija za evropske integracije u odnosu na druge parlamentarne komisije, saradnji komisija s organizacijama civilnog društva i institucijama EU i o funkcijama nadzora nad radom komisija za evropske poslove, nakon čega je uslijedila rasprava o posljednjem izvještaju EU o napretku i analizama rezultata Izvještaja.

Prva tačka završena je obraćanjem Csillae Schalberta, koordinatora IPA Twinning projekta „Jačanje albanskog parlamenta“.

Uvodničari za drugu tačku dnevnog reda – „Trenutni izazovi Sporazuma o stabilizaciji i pridruživanju/ proces pregovaranja s EU i obaveze koje slijede za komisije za evropske integracije“ bili su Ditmir Bushati, predsjedavajući Komisije za evropske integracije Parlamenta Albanije, i Majlinda Bregu, ministrica za evropske integracije Albanije. Nakon prezentiranja stanja u kojem se nalazi Albanija na svom putu integracije koje je predočila gđa Bregu, sve delegacije imale su kratko izlaganje o pripremanju narednih koraka u procesu priključenja EU, o obavezama i statusu svake države pojedinačno u procesu pregovaranja s EU, neophodnosti zajedničke strategije zemalja Zapadnog Balkana u odnosu na EU i nastavaku samita EU-Zapadni Balkan (održanog u Sarajevu 2010.).

Skupu se obratio Clive Rumbold, šef Političkog sektora Delegacije EU u Albaniji, koji je govorio o strategiji proširenja EU.

Uvodničari za treću tačku dnevnog reda – “Debata o budućim izazovima i metodama rada COSAP-a“ - bili su Halid Genjac, predsjedavajući Komisije za evropske integracije PSBiH, i Jelica Minić, zamjenik generalnog sekretara Vijeća za regionalnu saradnju (RCC). Razmatrano je pitanje potrebe saradnje između komisija radi bolje pripreme za novu fazu pregovaranja s EU, metoda rada, lekcija naučenih iz regionalne parlamentarne saradnje i primjene principa rotacije predsjedavanja.

U zaključnom dijelu skupu obratili su se Petra Blaess-Rafajlovski, iz Fondacije ‘Fridrich Ebert’, koja je govorila o značaju uključivanja organizacija civilnog društva u nadgledanje pregovaračkog procesa s EU, i Gjergji Murra iz RCC-a koji je govorio o značaju regionalne saradnje.

Poslije završnog izlaganja predložen je tekst Zajedničke izjave, koja je jednoglasno usvojena. Najavljen je sljedeći sastanak koji će biti održan u Sarajevu.

Tekst Zajedničke izjave dostavljamo u prilogu.

Vlatka Dangubić, sekretar Komisije

Dostaviti: Komisiji za vanjske poslove
Sektoru za međunarodne odnose i protokol